

**ХӨРӨНГӨ ОРУУЛАЛТЫН ТУХАЙ ХУУЛИЙН ШИНЭЧИЛСЭН
НАЙРУУЛГЫН ТӨСӨЛ БОЛОН ХАМТ ӨРГӨН МЭДҮҮЛСЭН
ХУУЛЬ, ТОГТООЛЫН ТӨСЛҮҮДИЙГ ХЭЛЭЛЦЭХ ЭСЭХ
ТАЛААРХ ЭДИЙН ЗАСГИЙН БАЙНГЫН ХОРООНЫ
САНАЛ, ДҮГНЭЛТ**

2023 оны 07 дугаар
сарын 04-ний өдөр

Улаанбаатар
хот

Илтгэгч нь: Улсын Их Хурлын гишүүн Х.Ганхуяг

Улсын Их Хурлын дарга, эрхэм гишүүд ээ,

Монгол Улсын Засгийн газраас 2023 оны 06 дугаар сарын 23-ны өдөр Улсын Их Хуралд өргөн мэдүүлсэн Хөрөнгө оруулалтын тухай хуулийн шинэчилсэн найруулгын төсөл болон хамт өргөн мэдүүлсэн хууль, тогтоолын төслүүдийг үзэл баримтлалын хүрээнд хэлэлцэх эсэх асуудлыг Эдийн засгийн байнгын хороо 2023 оны 07 дугаар сарын 04-ний өдрийн хуралдаанаараа хэлэлцлээ.

Хууль санаачлагч нь Монгол Улс дахь хөрөнгө оруулалтын орчныг сайжруулах, шинээр хөрөнгө оруулалт орж ирэх үед тусгай зөвшөөрөл авах, бүртгүүлэх үйл ажиллагааг сайжруулж, хөрөнгө оруулалтын үе шатанд тогтвортой байдал, үйл ажиллагааг шуурхай явуулах нөхцөлийг хангах, хөрөнгө оруулагчийн хууль ёсны эрх, ашиг сонирхлыг хамгаалах, гомдол, маргааныг шуурхай шийдвэрлүүлэх тогтолцоог бүрдүүлэх, хөрөнгө оруулалтын бодлого, хууль тогтоомжийн хэрэгжилтийг улс, салбар, салбар хооронд болон бүс, орон нутгийн түвшинд уялдуулан зохицуулах, хөрөнгө оруулалтын чиглэлээр төрийн байгууллагын уялдаа холбоог хангах, хүчин төгөлдөр мөрдөгдөж байгаа Хөрөнгө оруулалтын тухай хуулиар зохицуулж буй зарим харилцааг тодруулах, хууль хоорондын уялдааг сайжруулан гадаадын шууд хөрөнгө оруулалтыг нэмэгдүүлэх замаар эдийн засгийн өсөлтийг дэмжих, хөрөнгө оруулалтын орчинд тулгамдаж байгаа асуудлуудыг шийдвэрлэх зорилгоор Хөрөнгө оруулалтын тухай хуулийн шинэчилсэн найруулгын төслийг боловсруулжээ.

Хуулийн төслийг d.parliament.mn цахим сайтад байршуулж иргэд, олон нийтийн саналыг авч байна.

Байнгын хорооны хуралдаанаар хуулийн төслүүдийг хэлэлцэх үед Улсын Их Хурлын гишүүн Ч.Ундррам татварын болон татварын бус урамшууллын талаар, гадаадын хөрөнгө оруулагчид олгох газар ашиглах эрхийн хугацаа болон хөрөнгө оруулагчдын эрх, ашгийг хохироосон хууль, хяналтын байгууллагуудын үйл ажиллагааг хянан шалгах ажлын хэсгийн үйл явцын талаар, Улсын Их Хурлын гишүүн Т.Аубакир хөрөнгө оруулалттай холбоотой маргааныг тусгайлан хянан шийдвэрлэх бизнесийн хэргийн дагнасан шүүх байгуулах боломжийн талаар, Улсын Их Хурлын гишүүн Ж.Бат-Эрдэнэ, Х.Ганхуяг нар хөрөнгө оруулагч бүртгүүлэх, зөвшөөрөл олгох явцыг хялбаршуулах, төрийн үйлчилгээний хүнд суртлыг бууруулах, “ноу-хау” бүхий гадаадын боловсон хүчинд хөнгөлөлттэй нөхцөл үзүүлэх эсэх талаар, Улсын Их Хурлын гишүүн Д.Батлут Монгол Улсын нэгдэн орсон олон улсын гэрээ, конвенцод хуулийн төсөл нийцсэн эсэх талаар, Улсын Их Хурлын гишүүн О.Цогтгэрэл гадаадын хөрөнгө оруулалт буурсан шалтгааныг хэрхэн тодорхойлсон, хууль батлагдсанаар хөрөнгө оруулагчид ямар давуутай нөхцөл байдал бий болох талаар, Улсын Их Хурлын гишүүн Т.Доржханд

хөрөнгө оруулалтыг эдийн засагт үзүүлэх ач холбогдол, зах зээлд ойр байдлаар нь эрэмбэлсэн эсэх, хөрөнгө оруулалт татахад сөргөөр нөлөөлдөг ханшийн эрсдэлийн талаар, Улсын Их Хурлын гишүүн Ж.Бат-Эрдэнэ гадаадын хуулийн этгээдэд олгох газар ашиглах эрхийн хугацааны талаар, Улсын Их Хурлын гишүүн Х.Ганхуяг хөрөнгө оруулагчийн өмчийг хэрхэн хамгаалах, гомдол маргааныг шийдвэрлэх шүүх байгууллага болон данс битүүмжлэх эрх бүхий төрийн байгууллагуудын үйл ажиллагааны талаар, хууль батлагдсанаар Монгол Улс Дэлхийн банкны бизнесийн орчны судалгаанд эрэмбэлэгдсэн одоогийн байр сууринаас хэдий хэмжээгээр дээшлэх талаар тус тус асуулт асууж, хариулт авлаа.

Мөн хуулийн төсөлтэй холбогдуулан Улсын Их Хурлын гишүүн Д.Батлут Монгол Улсын нэгдэн орсон олон улсын гэрээ, конвенцыг судалж, үүрэг хариуцлагыг нөхцөлдүүлэх, гадаадын хөрөнгө оруулагчид газар ашиглуулах асуудлыг анхаарах, Улсын Их Хурлын гишүүн О.Цогтгэрэл Монгол Улсын газар зүйн байршлын онцлог нь татварын хувь хэмжээнд сөргөөр нөлөөлдөг асуудлыг сайтар судалж хуулийн төсөлд тусгах, Улсын Их Хурлын гишүүн Х.Ганхуяг Монгол Улсаас гадаад улсад суугаа Элчин сайдын яам, Дипломат төлөөлөгчийн газрын албан хаагчдыг хөрөнгө оруулалт татах чиглэлээр үүрэгжүүлэх, Улсын Их Хурлын гишүүн Т.Доржханд хөрөнгө оруулалтыг эдийн засагт үзүүлэх ач холбогдол, зах зээлийн боломжоор нь уул уурхайгаас бусад салбарт чиглэсэн байдлаар эрэмбэлэх, ханш тогтворжуулах арга хэмжээгээ тодорхойлж, гадаадын хөрөнгө оруулалтыг тэлэх замаар эдийн засгийг дэмжих нь зүйтэй гэсэн саналыг тус тус гаргасан болно.

Байнгын хорооны хуралдаанаар дээрх хууль, тогтоолын төслүүдийг үзэл баримтлалын хүрээнд дэмжих эсэх асуудлаар санал хураалт явуулахад хуралдаанд оролцсон гишүүдийн олонх дэмжиж, Улсын Их Хурлын чуулганы нэгдсэн хуралдаанаар хэлэлцүүлэх нь зүйтэй гэж үзлээ.

Улсын Их Хурлын эрхэм гишүүд ээ,

Хөрөнгө оруулалтын тухай хуулийн шинэчилсэн найруулгын төсөл, Хөрөнгө оруулалтын тухай хууль хүчингүй болсонд тооцох тухай хуулийн төсөл, Хуулийн этгээдийн улсын бүртгэлийн тухай хуульд нэмэлт, өөрчлөлт оруулах тухай хуулийн төсөл, Газрын тухай хуульд нэмэлт оруулах тухай хуулийн төсөл, Улсын тэмдэгтийн хураамжийн тухай хуульд өөрчлөлт оруулах тухай хуулийн төсөл, Цөмийн энергийн тухай хуульд өөрчлөлт оруулах тухай хуулийн төсөл, Төрийн хяналт шалгалтын тухай хуульд нэмэлт оруулах тухай хуулийн төсөл, Гадаадын иргэний эрх зүйн байдлын тухай хуульд нэмэлт, өөрчлөлт оруулах тухай хуулийн төсөл, Зөрчлийн тухай хуульд өөрчлөлт оруулах тухай хуулийн төсөл, Аудитын тухай хуульд өөрчлөлт оруулах тухай хуулийн төсөл, Хөрөнгийн үнэлгээний тухай хуульд өөрчлөлт оруулах тухай хуулийн төсөл, Байгаль орчинд нөлөөлөх байдлын үнэлгээний тухай хуульд өөрчлөлт оруулах тухай хуулийн төсөл, Усны тухай хуульд өөрчлөлт оруулах тухай хуулийн төсөл, Байгалийн ургамлын тухай хуульд өөрчлөлт оруулах тухай хуулийн төсөл, Гаалийн тариф, гаалийн татварын тухай хуульд өөрчлөлт оруулах тухай хуулийн төсөл, Монгол Улсын нийслэл Улаанбаатар хотын эрх зүйн байдлын тухай хуульд өөрчлөлт оруулах тухай хуулийн төсөл, Нэмэгдсэн өртгийн албан татварын тухай хуульд нэмэлт оруулах тухай хуулийн төсөл, Барилгын тухай хуульд өөрчлөлт оруулах тухай хуулийн төсөл, Зөвшөөрлийн тухай хуульд өөрчлөлт оруулах тухай хуулийн төсөл, Хөрөнгө оруулалтын төрөлжсөн банкны тухай хуульд өөрчлөлт оруулах тухай хуулийн төсөл болон “Хуулийн хэрэгжилт хангуулах тухай” Улсын Их Хурлын тогтоолын

төслийг хэлэлцэх эсэх талаарх Эдийн засгийн байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

ЭДИЙН ЗАСГИЙН БАЙНГЫН
ХОРООНЫ ДАРГА



Ц.ЦЭРЭНПУНЦАГ